

मार्निंग डोगरी न्यूज बुलेटिन, समें. 09.20 Hrs

<><><><><><>

Headlines

- 1- विदेश मंत्री एस. जयशंकर होरें आखेआ ऐ जे पी.ओ.जे.के भारत दा अनत्रुट हिस्सा ऐ ते पाकिस्तान कन्नै सरबंधित आतंकवाद सब्बनें थवां बड्डा मुद्दा ऐ।
- 2- जम्मू लोकसभा हल्के लेई 26 मेदवारें अपना नामांकन भरेआ ऐ। नामांकन वापस परताने दी खीरी तरीक 8 अप्रैल ऐ।
- 3- मुख्ख सचिव होरें जम्मू-कश्मीर च आपराधिक कन्नूनें दी अमलावरी दा जायजा लैता।
- 4 ते आई.पी.एल क्रिकेट च कल रातीं अहमदाबाद दे नरेंद्र मोदी स्टेडियम च खेड्डे गेदे मैच च पंजाब किंग्स नै गुजरात टाइटन्स गी त्रै विकेटें कन्नै हराई दिता।

<><><><><><>

EAM-POJK

विदेश मंत्री जय शंकर होरें आखेआ जे पाकिस्तान दे नजैज कब्जे आला जम्मू-कश्मीर भारत दा अनत्रुट अंदरूनी हिस्सा ऐ। विदेश मंत्री होरें आखेआ जे पाकिस्तान कन्ने जुड़ी दी सब्बनें थवां बड्डी चिंता आतंकवाद ऐ ते जेकर किश गलत हुंदा ऐ तां फी ओदा बनकदा परता दिता जाग। कल तिरुवंथपुरम च इक प्रेस कांफ्रेंस गी संबोधित करदे होई विदेश मंत्री होरें आखेआ जे पी.ओ.जे.के मसले पर मुख्ख दा रूख पूरी चाल्ली साफ ऐ ते संसद पी.ओ.जे.के पर इकजुट ऐ जे

पी.ओ.जे.के भात दा हिस्सा ऐ। आतंकवाद आले मुद्दे पर गल्ल करदे होई जयशंकर होरें
आखेआ जे सरकार दा आतंकवाद पर रौंस पूरी चाल्ली साफ ऐ जे ओह आतंकवाद गी दना बी
नजरअंदाज नेई करोग ते एहदे कन्नै सख्ती कन्नै निब्बड़ेया जाग।

<><><><><><>

UP-ATS-Terror

उत्तर प्रदेश दे आतंकवाद रोधी स्काड ए.टी.एस नै 2 पाकिस्तानी नागरिकें ते श्रीनगर आधारित
उंदे सहायक गी गिरफ्तार कीता ऐ। एह लोक जाली दस्तावेजें राएं भारत बन्ने राएं मुख्य च
दाखल होए हे। अधिकारिएं मुजब गिरफ्तार कीते गेदे लोकें दी पंछान मोहम्मद अलताफ भट्ट,
सैयद गजनफर दे तौर पर होई ऐ। एह दवै पाकिस्तानी नागरिक न। गिरफ्तार कीते गेदे इक
होर व्यक्ति दी पंछान श्रीनगर दे नासिर अली दे तौर पर कीती गई ऐ। ए.टी.एस नै दस्सेआ ऐ
जे मोहम्मद अलताफ भट्ट कश्मीर च पैदा होआ हा पर ओह पाकिस्तान चली गोआ ते उत्थे गै
बसी गेदा ऐ। इनें त्रोंणें पाकिस्तान आधारित हिज्बुल मुजाहिद्दीन आतंकवादी संगठन आस्सेआ
सिखलाई हासिल कीती ते एह लोक भारत च आतंकी हमलें दी योजना बना रदे हे।

<><><><><><>

2nd Phase Nomination

लोकसभा चुनांस दे दुए गेड़ लेई नामांकन भरने दा कल खीरी दिन हा। जम्मू पार्लिमानी हल्के
लेई बी नामांकन भरने दा कल खीरी ध्याड़ा हा। इस हल्के लेई दुए गेड़ तैहत 26 अप्रैल गी
मतदान होना ऐ। आकाशवाणी जम्मू संवाददाता दी रिपोर्ट मुजब कल नामांकन भरने दे
अखीरले दिन 9 मेदवारें अपना नामांकन भरेआ जेदे मगरा जम्मू पार्लिमानी हल्के लेई मेदवारें

दी कुल गिनतरी 26 तगर जाई चुकी दी ऐ। नामांकन पत्रें दी जांच आला कम्म कल कीता जाग। मेदवार जेकर चाहन, ओह अपना नांs 8 अप्रैल दिनें 3 बजे तगर वापस परताई सकदे न। जम्मू पार्लिमानी हल्के च त्रै जिले जम्मू, सांबा ते रियासी औंदे न। इत्थे मतदाताएं दी कुल गिनतरी 17 लख 67 जहार 837 ऐ जिंदे च 9 लख 15 जहार 10 मर्द, 8 लख 52 जहार 796 महिलां ते 18 ट्रांसजेंडर मतदाता शामिल न। लोकसभा हल्के लेई 2 जहार 416 मतदान केंद्र कायम कीते गेदे न।

<><><><><><>

ECI-Voter

औंदे चुनाएं च कोई बी मतदाता वोट पाने दे अपने हक्के थमां वंचित नेई रवै, इस गल्लै गी यकीनी बनाने लेई भारतीय चुनांs आयोग नै मतदान अधिकारियें गी मतदाताएं दे नां च थोड़ी मती त्रुटियें ते खामिएं गी अनदिक्खा करने लेई आखेआ। एह बी आखेआ गेआ ऐ जे कुसै होर विधानसभा क्षेत्र दे चुनांs रजिस्ट्रेशन अफसर आस्सेआ जारी कीते गेदे वोट आई.डी कार्ड गी पंछान लेई स्वीकार कीता जाग, बशर्ते मतदाता दा नां उस मतदान केंद्र दी मतदाता सूची च होए जित्थे ओह हाजिर होए न। फोटो दे बेमेल दी स्थिति च मतदाता गी चुनांs आयोग आस्सेआ सूचीबद्ध वैकल्पिक फोटो दस्तावेजें जियां आधार कार्ड, मनरेगा जाब कार्ड, डाक घर च बैंक आस्सेआ पासबुक च फोटो, सेहत बीमा कार्ड, ड्राइविंग लाइसेंस या पैन कार्ड वगैरा चा कोई इक पेश करना होग।

<><><><><><>

DEO Rajouri

राजौरी दे जिला चुनांस अधिकारी ओ.पी भगत होरें फ्लाइंग स्काड, निगरान टीम, एस.एस.टी ते तहसीलदारें दे कम्मकाज दा जायजा लैने आस्तै इक बैठक दी अध्यक्षता कीती। एह बैठक लोकसभा चुनांस 2024 दे सरबंधें च लाई गई। जिला चुनांस अधिकारी होरें कीती गेदी कार्रवाइएं बारै पूरी जानकारी दस्तावेजें राएं रक्खने लेई आखेआ तां जे पारदर्शिता ते जवाबदेई यकीनी बनी सकै। टीम गी आदर्श आचार संहिता दी पूरी चाल्ली अमलावरी यकीनी बनाने लेई बी गलाया गेआ।

<><><><><><>

Women SVEEP

रामबन दे चुनांस मैहकमे नै स्वीप जत्न तैहत महिला गी जागरूक करने लेई कार्यक्रम दा सरिस्ता कीता। आकाशवाणी दे रामबन थमां संवाददाता दी जानकारी मुजब महिला मतदाताएं ते आंगनवाड़ी अमले गी इलेक्ट्रानिक वोटिंग मशीन्स ते वी.वी-पैट बारै जानकारी दिती गई। इस दौरान मतदाताएं गी वोट पाने लेई जागरूक बी कीता गेआ। उनेंगी मुख्य दे हितें च बदी चढ़िए वोट पाने ते प्रक्रिया च अग्गे आइए हिस्सा लैने लेई आखेआ गेआ।

<><><><><><>

Ramgarh-SVEEP

रामगढ़ च एनएसएस युनिट प्रभा ते सरकारी डिग्री कालेज दी चुनांस सरबंधी जागरूकता पैदा करने लेई ई.एल.सी नै इक रैली ते नुक्कड़ नाटक दा स्वीप तैहत आयोजन कीता तां जे चुनाएं प्रति जागरूकता पैदा कीती जाई सकै। इस रैली दा मकसद लोकें गी वोट पाने दे अपने हक्कें गी बरतने दी महत्ता पर जोर पाना हा। कालेज दे विद्यार्थियें नुक्कड़ नाटक च हिस्सा लेइये

लोकें च चुनावी प्रक्रिया च शामिल होने बारे जागरूक कीता। लोकें च आँदे लोकसभा चुनावं गी दिक्खदे होई बड़ा मता उत्साह दिक्खेआ जा'रदा ऐ ते उनेंगी इस बारे बी जानकारी ऐ जे देश दे लोकतंत्र गी नमें सिरेआ रूप देने च उंदी किन्नी महता ऐ।

<><><><><><>

New Criminal Laws

मुख्य सचिव अटल डुल्ल हारें कल इक उच्ची सतह दी बैठक च गृह, पुलिस ते कन्न विभाग दे वरिष्ठ अधिकारियें कन्ने रलिये संसद आस्सेआ 2023 च जम्मू-कश्मीर च त्रऊं नमें आपराधिक कन्नूनें दी अमलावरी दी समीक्षा कीती। मुख्य सचिव हारें नमें कन्नूनें बारे कर्मियें दी क्षमता ते सिखलाई सरबन्धी अजें तोड़ी कीते गेदे उपायें दा संज्ञान लैता ते अग्गे आखेआ जे तय समे-सीमां दे अंदर समूलचे जम्मू-कश्मीर च इनें कन्नूनें गी लागू करने लेई इक वरिष्ठ पुलिस अधिकारी गी पूरी पराती जानकारी ते सिद्धे राबते लेई नियुक्त कीता जा। उनें नमें संशोधित कन्नूनें मताबक पुलिस मैनुअल च कीते जाने आले बदलावें बारे बी जानकारी लैती।

<><><><><><>

JK School

जम्मू-कश्मीर स्कूली शिक्षा विभाग नै 2024-25 शैक्षणिक सत्र च पैहली जमात च दाखले लेई विद्यार्थियें दी उम्री च ढिल्ल देने दी इजाजत दिती ऐ जेदे कन्ने उनें माता-पिता गी राहत होग जिंदे बच्चें दी बरेसू 6 साल अजें नेई होई ऐ। स्कूली शिक्षा जम्मू दे निदेशक आस्सेआ जारी कीती गेदी इक विज्ञप्ति मुजब पिच्छले बरे च पैहलें गै प्री-प्राइमरी च दाखला लैने आले विद्यार्थियें गी शैक्षणिक सत्र 2024-25 लेई पैहली जमात च दाखले दी इजाजत दिती जा रदी

ऐ। अग्गे आखेआ गेआ ऐ जे इक्कै बारी लेई छूट दिती जा रदी ऐ जेदे च बच्चे अगले 6 म्हीने यानि 30 सितंबर 2024 तगर 6 साल दे होई जाडन। उनेंगी इस कन्ने फायदा होग।

<><><><><><>

Checking-Reasi

औंदे त्पारें ईद-उल-फितर नरातें ते बैसाखी दे मददेनजर जिला विकास आयुक्त रियासी हुंदी अगुवाई च इक टीम नै त्पारिएं दा जायजा लैता ते रियासी कस्बे च बजार च चीजें बस्तें दी जांच कीती। जांच दौरान नियमें दी खिलाफवर्जी करने आले थवां 16 सौ रपे बतौर जुर्माना वसूल कीते गए। इस दौरान मुत्तलका लोकें गी रेट लिस्ट्स लाने, म्यारी चीजां बस्ता उपलब्ध करोआने ते तय भाएं थवां बद्द नेई वसूल करने बारै जानकार कीता गेआ।

<><><><><><>

CBDT

केंद्री प्रत्यक्ष कर बोर्ड नै करदाताएं गी पैहली अप्रैल 2024 थमां आंकलन बरे 2024-25 लेई अपने इंकम टैक्स रिटर्न जमा करने च सहूलत दिती ऐ। करदाताएं आस्सेआ आमतौर पर इस्तेमाल कीते जाने आले आई.टी.आर-1, आई.टी.आर-2 ते आई.टी.आर-4 जनेह इंकम टैक्स रिटर्न दाखल करने लेई ई-फिलिंग पोर्टल पर उपलब्ध न। कंपनियां आई.टी.आर-6 राएं बी आई.टी.आर जमा कराई सकदियां न। बोर्ड नै आखेआ ऐ जे आंकलन बरे 2024-25 लेई तकरीबन 23 जहार आई.टी.आर दर्ज करी दिते गेदे न।

<><><><><><>

RBI-Policy

भारतीय रिजर्व बैंक अज्ज माली बरे 2024-25 लेई पैहली दऊं-दऊं म्हीनें आहली मौद्रिक नीति दा ऐलान करोग। रिजर्व बैंक दे गवर्नर शक्तिकांत दास हुंदी प्रधानता च मौद्रिक नीति सरबन्धी कमेटी दी त्रऊं दिनें दी बैठक जंदे बुधवारें शुरू होई ही। कमेटी दिआं कुल 6 बैठकां इस माली बरे दरान लग्गनियां न। अर्थशास्त्रिणं दा अंदाजा ऐ जे केंद्री बैंक इक बारी फी प्रमुख ब्याज दरें च कोई तब्दीली नेई करोग ते मुद्रास्फीति गी काबू च रक्खने पर ध्यान देग। पिच्छली बारी आर.बी.आई नै फरवरी 2023 च रेपो रेट च बाददा कीता हा ते इसी 6 इशारिया 5 प्रतिशत करी दिता हा। एहदे बाद थमां रेपो रेट इस्सै स्तर पर ऐ।

<><><><><><>

IPL

आई.पी.एल क्रिकेट च जंदी रातीं अहमदाबाद दे नरेंद्र मोदी स्टेडियम च पंजाब किंग्स नै गुजरात जायंट्स गी 3 विकेटें कन्नै हराई दिता। पैहले बल्लेबाजी करदे होई गुजरात टाइटन्स दी टीम नै 4 विकेटां मोआइये 199 रन्ज बनाए। पंजाब किंग्स नै लक्ष्य दा पिच्छा करदे होई 7 विकेटां मोआइये 19 ओवरें ते 5 गेंदगें च 200 रन्ज बनाइये मैच च जित्त हासल कीती। अज्ज संझा साइडे सत बजे हैदराबाद च सनराइजर्स हैदराबाद ते चेन्नई सुपर किंग्स बश्कार मैच खेइडेया जाग।

<><><><><><>